

INTERNATIONAL UNIVERSITY OF SARAJEVO
INTERNACIONALNI UNIVERZIET U SARAJEVU
ULUSLARARASI SARAYBOSNA ÜNİVERSİTESİ



INTERNATIONAL
UNIVERSITY OF SARAJEVO

P R A V I L N I K

O DISCIPLINSKOJ I MATERIJALNOJ

ODGOVORNOSTI STUDENATA

DATUM: DECEMBAR 2024

BROJ: IUS-SENAT-11-3813/24

Na osnovu člana 61. stav (1), tačka d) Zakona o visokom obrazovanju („Službene novine Kantona Sarajevo“, broj 36/22), i čl. 125. i 192. stav (1), tačka 13) Statuta Internacionalnog univerziteta u Sarajevu, broj: IUS-SENAT-11-3326/24 od 22.10.2024 godine - prečišćeni tekst, Senat Internacionalnog univerziteta u Sarajevu (u daljnjem tekstu: Senat), na svojoj 185. sjednici, održanoj 24.12.2024. godine, donosi

P R A V I L N I K

O DISCIPLINSKOJ I MATERIJALNOJ ODGOVORNOSTI

STUDENATA

I OPĆE ODREDBE

Član 1. **(Predmet)**

Pravilnikom o disciplinskoj i materijalnoj odgovornosti studenata (u daljnjem tekstu: Pravilnik) utvrđuju se subjekti disciplinske i materijalne odgovornosti, vrste povreda disciplinske odgovornosti, principi disciplinskog postupka, nadležnost za pokretanje i vođenje disciplinskog postupka, tok disciplinskog postupka, vrste disciplinskih mjera i njihovo izricanje, kao i druga relevantna pitanja u vezi sa odgovornošću studenata Internacionalnog univerziteta u Sarajevu.

Član 2. **(Principi)**

- (1) Subjekt disciplinskog postupka se smatra nevinim za povrede obaveza (discipline) sve dok konačna odluka donesena na kraju disciplinskog postupka ne utvrdi njegovu odgovornost.
- (2) Sumnju u pogledu postojanja činjenica koje čine obilježja povrede obaveze (discipline) ili od kojih zavisi primjena neke odredbe ovog Pravilnika disciplinski organ rješava odlukom na način koji je povoljniji za subjekta disciplinskog postupka.
- (3) Postupak za utvrđivanje disciplinske odgovornosti ili povrede mora se sprovesti provodi se bez odlaganja, i to na način da se predstave svi dokazi potrebni za ispravno utvrđivanje činjenica i za donošenje zakonite i pravilne odluke.
- (4) Smatra se da subjekt disciplinskog postupka vlada engleskim jezikom ukoliko je uspješno položio finalni ispit engleskog jezika („Proficiency Exam“), odnosno ako je oslobođen od polaganja istog u skladu sa posebnim propisom.
- (5) U kontekstu provedbe odredbi iz disciplinske odgovornosti vezane za nastavni proces, nastavno osoblje postupa u ulozi službenih lica sa istaknutim ovlaštenjima i odgovornošću.
- (6) Izrazi korišteni u ovom Pravilniku koji imaju rodno značenje, bez obzira koriste

li se u muškom ili ženskom rodu, odnose se jednako na muški i ženski rod.

Član 3.
(Subjekt disciplinskog postupka)

Subjekt disciplinskog postupka u smislu ovog Pravilnika je student Internacionalnog univerziteta u Sarajevu.

Član 4.
(Pojam i obaveze studenta)

- (1) Student je lice upisano na Internacionalni univerzitet u Sarajevu (u daljnjem tekstu: Univerzitet), koje studij pohađa redovno, vanredno, učenjem na daljinu ili kombinovanjem ova tri modela studiranja na način utvrđen Statutom Univerziteta.
- (2) Studentom iz stava (1) ovog člana, smatra se i lice koje pohađa Školu engleskog jezika (u daljnjem tekstu: „ELS“), lice koje je gostujući student sa druge visokoškolske ustanove i lice upisano na neki od necikličnih oblika obrazovanja kojeg organizuje i izvodi Univerzitet.
- (3) Status studenta dokazuje se studentskom identifikacionom karticom koju izdaje Univerzitet i odgovarajućim evidencijama koje vodi Studentska služba.
- (4) Student je dužan da se pridržava propisa utvrđenih Zakonom o visokom obrazovanju, Statutom, i općim aktima Univerziteta, da čuva ugled i poštuje prava zaposlenih i studenata na Univerzitetu, da poštuje propisanu disciplinu i uobičajena pravila ponašanja na Univerzitetu i da uredno izvršava svoje obaveze.

Član 5.
(Odgovornost studenta)

- (1) Odgovornost studenta može biti:
 - a) Disciplinska, usljed povrede obaveze (discipline) studenta;
 - b) Materijalna (naknada štete), kada je prouzrokovana materijalna šteta.
- (2) Odgovornost iz stava (1) ovog člana temelji se na krivnji (subjektivna odgovornost).
- (3) Disciplinska povreda je ona povreda koja je ovim Pravilnikom propisana kao vrsta disciplinske povrede i koja predstavlja povredu odredaba o obavezama studenta.
- (4) Za naročito teške povrede obaveze (discipline) studenta (npr. ponašanja kojim se ugrožava ugled Univerziteta, te izazivanje opće opasnosti ili prijetnja istom, čime se narušava opća sigurnost na Univerzitetu, i sl.), propisuje se povrat stipendije i drugih davanja koje je student primio tokom studija od Univerziteta, odnosno njegovog osnivača, a što utvrđuje rektor posebnim aktom.

Član 6.
(Vrste disciplinskih povreda)

Disciplinska povreda može biti:

- a) Lakša povreda obaveza;
- b) Teža povreda obaveza.

Član 7.
(Lakša povrede obaveza)

Lakšom povredom obaveze (discipline) studenata smatra se:

- a) Kašnjenje na predavanja, vježbe i druge obavezne oblike nastave ili neopravdano napuštanje istih prije određenog vremena;
- b) Nedostavljanje potrebnog dokumenta Univerzitetu (npr. dokaz o boravišnoj dozvoli, ljeakarsko uvjerenje i sl.);
- c) Nedolično ponašanje na Univerzitetu ili neprimjeren odnos prema studentima, nastavnicima, saradnicima i drugim zaposlenicima Univerziteta;
- d) Prouzrokovanje manje materijalne štete na predmetima u vlasništvu Univerziteta ili u vlasništvu drugih lica, u okviru Kampusu Univerziteta;
- e) Ponašanje koje može narušiti ugled Univerziteta, studenata, nastavnika, saradnika i drugih zaposlenika Univerziteta;
- f) Nošenje odjeće na univerzitetkom kampusu koja se smatra neprimjerenom za akademsku ustanovu. To uključuje odjeću s političkim, etničkim ili vulgarnim porukama, kao i odjeću koja se obično nosi u teretanama, na plažama i bazenima;
- g) Pisanje ili crtanje sadržaja ili postavljanje postera i banera na kampusu na mjestima koja nisu predviđena za to i bez odobrenja nadležnih tijela Univerziteta;
- h) Pušenje, uključujući cigarete i elektroničke cigarete, unutar zgrada Univerziteta i na označenim područjima za nepušače na kampusu;
- i) Ostali vidovi ponašanja koji su suprotni akademskim načelima ponašanja, a koji se mogu svrstati pod lakše povrede obaveza (discipline) studenata, odnosno za koje je predviđena prekršajna ili krivična odgovornost u skladu sa zakonom.

Član 8.
(Teža povreda obaveza)

Težom povredom obaveza (discipline) studenta smatra se:

- a) Sprečavanje ili ometanje održavanja nastave (predavanja, vježbe), ispita ili rada na Univerzitetu;
- b) Falsifikovanje isprava uopće, a naročito javnih isprava koje izdaje Univerzitet odnosno njegove organizacione jedinice;
- c) Prepravka ili dopisivanje podataka u evidenciji koju vodi Univerzitet, odnosno njegove organizacione jedinice;
- d) Davanje neistinitih podataka nadležnim licima i organima Univerziteta uopće, a naročito radi ostvarivanja prava koja im po važećim propisima ne pripadaju;

- e) Iznošenje netačnih informacija o radu i poslovanju Univerziteta;
- f) Nedozvoljeno umnožavanje autorski zaštićenih tekstova, plagijat, direktno citiranje, parafraziranje ili prepričavanje iz izvora bez navođenja autora i djela;
- g) Krađa;
- h) Izazivanje nereda ili tuče, učešće u tuči ili pozivanje na iste u okviru kampusa Univerziteta;
- i) Izražavanje nacionalne, vjerske, rasne i druge netrpeljivosti u okviru kampusa Univerziteta;
- j) Nepridržavanje sigurnosnih propisa i pravila na Univerzitetu, ulazanje u prostorije kampusa Univerziteta kojima je pristup zabranjen;
- k) Prouzrokovanje veće materijalne štete na predmetima u vlasništvu Univerziteta ili u vlasništvu drugih lica, u okviru Kampusa Univerziteta;
- l) Dolazak na kampus Univerziteta u alkoholiziranom ili opijenom stanju i/ili upotreba alkohola ili narkotičkih sredstava u okviru Kampusa Univerziteta;
- m) Osnivanje neformalne ili formalne organizacije ili bilo kakvog pravnog lica u okviru kampusa Univerziteta, ili pod imenom Univerziteta, bez prethodne saglasnosti nadležnog tijela Univerziteta, učešće u aktivnostima istih i sl.;
- n) Podstrekavanje ili pomaganje studenata pri konzumiranju alkohola, odnosno narkotičkih sredstava, trgovina i raspolaganje kao i samo posjedovanje istih u okviru kampusa Univerziteta;
- o) Pisanje ili crtanje neprimjerenih sadržaja na zidovima ili drugim površinama u okviru kampusa Univerziteta, uništavanje postavljenih natpisa, banera ili obavještenja;
- p) Varanje na ispitu (polaganje ispita umjesto drugog, korištenje nedozvoljenih sredstava, postupanje suprotno instrukcijama Univerzitetskog osoblja koje je odgovorno za regularno provođenje ispita, prepisivanje, i sl.), odnosno polaganje ispita protivno pravilima studiranja;
- q) Unošenje oružja i eksplozivnih naprava na kampus Univerziteta;
- r) Izazivanje opće opasnosti ili prijetnja istom, čime se narušava opća sigurnost na Univerzitetu;
- s) Odbijanje studenta da se podvrgne testiranju na droge ili druge psihoaktivne supstance (odbijanje ili izbjegavanje studenta da pristupi analizi krvi ili urina i sl.).
- t) Verbalno i svako drugo vrijeđanje nastavnika, saradnika ili zaposlenika Univerziteta, odnosno drugih lica na kampusu Univerziteta;
- u) Neredovno učestvovanje u nastavi, naročito ukoliko se time onemogućava kolektivan rad ostalih studenata te odsustvovanje sa zvanično određenih proba i obaveza bez valjanog opravdanja;
- v) Zloupotreba IUS identifikacione kartice, uključujući korištenje tuđe kartice, davanje vlastite kartice na korištenje drugoj osobi ili pokušaj zloupotrebe sistema naplate parkinga na univerzitetskom kampusu;
- w) Nepoštivanje odluka rektora, dekana, Vijeća fakulteta i drugih rukovodećih organa na Univerzitetu;
- x) Vršnjačko nasilje, kao svjesno, namjerno i uzastopno fizičko, psihološko, verbalno ili cyber zlostavljanje među vršnjacima;

- y) Seksualno uznemiravanje, kao neželjeno ponašanje seksualne prirode koje krši dostojanstvo pojedinca ili stvara zastrašujuće, neprijateljsko, ponižavajuće, sramotno ili uvredljivo okruženje. Seksualno uznemiravanje uključuje, ali nije ograničeno na, verbalno seksualno uznemiravanje (neprikladne opaske, seksualne šale ili eksplicitni komentari o nečijem izgledu), neverbalno seksualno uznemiravanje (neprimjereno buljenje, prikazivanje seksualno eksplicitnih materijala ili činjenje seksualnih gesta) i fizičko seksualno uznemiravanje (nepoželjno dodirivanje, grljenje, ljubljenje ili napad);
- z) Učestvovanje u aktivnostima ili projektima bez prethodne saglasnosti odgovarajućeg tijela ili organizacione jedinice Univerziteta, ukoliko je općim aktima Univerziteta takva saglasnost utvrđena kao neophodna;
 - aa) Nepostupanje po rješenju o obavezi naknade štete;
 - bb) Ponovno učinjenje lakše povrede obaveze (discipline) nakon izrečene disciplinske mjere;
 - cc) Pomaganje, podstrekavanje i prikrivanje aktivnosti svih lica koja čine disciplinsku povredu u smislu ovog Pravilnika;
 - dd) Ostali vidovi ponašanja studenta koji su suprotni akademskim načelima ponašanja, a koji se mogu svrstati pod težu povredu obaveze (discipline) studenta, odnosno za koje je predviđena prekršajna ili krivična odgovornost u skladu sa zakonom.

Član 9. (Povreda discipline kao krivično djelo)

Sljedeći postupci primjenjuju se u slučajevima kada bi navodna povreda obaveze (discipline) mogla predstavljati krivično djelo, ako se dokaže na sudu:

- a) Ako je započela policijska istraga ili krivični postupak ili postoji mogućnost da će započeti u vezi s navodnim krivičnim djelom, Univerzitet može obustaviti disciplinski postupak (u bilo kojoj fazi) dok se istraga/postupak ne završi. Disciplinski postupak može se ponovo pokrenuti u bilo kojoj fazi ako Univerzitet s obzirom na okolnosti smatra da je to potrebno.
- b) Nakon presude za krivično djelo (uključujući bilo koji oblik uvjetne osude), ako se poduzimaju radnje propisane ovim Pravilnikom, činjenice relevantne za kršenje studentske obaveze ne mogu se osporavati.
- c) Bilo koji student koji bude osuđen na kaznu zatvora u trajanju od jedne godine ili više, za krivično djelo priznato zakonom, može biti isključen sa Univerziteta. Student se može ponovno primiti na Univerzitet ukoliko podnese prijavu i uz dopuštenje rektora.
- d) Ako je student oslobođen, Univerzitet će uzeti u obzir odluku suda. Međutim, Univerzitet može istražiti preostale stvari od interesa za Univerzitet koje nisu razmotrene.
- e) Ako početna policijska istraga ne dovede do suđenja, to ne sprječava Univerzitet da provede daljnja istraživanja i/ili započne disciplinski postupak u vezi s preostalim pitanjima od interesa za Univerzitet koja nisu razmotrena.

Član 10.
(Svojstvo u izvršenju povrede obaveze (discipline))

- (1) Povredu obaveze (discipline) student može učiniti u svojstvu:
- a) izvršioca ili saizvršioca (više lica);
 - b) podstrekača;
 - c) pomagača, i
 - d) prikrivača.
- (2) Svojstvo lica i stepen krivice istoga u izvršenju povrede (obaveze) discipline utvrđuju se u postupku utvrđenim ovim Pravilnikom.

Član 11.
(Mjesto izvršenja povrede obaveze (discipline))

Povreda obaveze (discipline) može biti učinjena:

- a) bilo gdje u okviru kampusa Univerziteta;
- b) u prostorijama ili ispred prostorija u kojima se izvodi dislocirana nastava;
- c) na svakom drugom mjestu, ako se preduzetim radnjama narušava ugled Univerziteta ili nanosi šteta drugim studentima, nastavnicima, saradnicima ili nenastavnom osoblju Univerziteta (npr. iznošenje neistinitih informacija, podataka i sl.);
- d) na svakom drugom mjestu, ako se preduzetim radnjama namjeravalo steći neko pravo na protupravan način ili protivpravna imovinska korist (npr. falsifikovanje javne isprave koju izdaje Univerzitet).

Član 12.
(Vrijeme izvršenja povrede obaveze (discipline))

Postupak utvrđivanja odgovornosti za povredu obaveze i discipline studenta može se pokrenuti samo protiv lica koje je u vrijeme učinjenja imalo status studenta, odnosno koje je bilo u postupku sticanja statusa studenta, kao i protiv lica koje je položilo sve ispite, ali nije ispunilo obaveze propisane općim aktima u smislu izdavanja diplome (*clearance*).

Član 13.
(Primjena pravila na prouzrokovanje štete)

Odredbe ovog Pravilnika analogno se primjenjuju i na slučajeve prouzrokovanja i nanošenja štete.

II DISCIPLINSKE MJERE I NAKNADA ŠTETE

Član 14. (Disciplinske mjere)

Studentu se za povredu za povredu obaveza (discipline) izriče jedna ili više disciplinskih mjera:

- a) **Opomena**, koja se izriče za lakšu povredu obaveze (discipline) iz člana 7. ovog Pravilnika;
- b) **Opomena pred isključenje**, koja se izriče kada je student istovremeno ili u kratkom vremenu učinio više lakših povreda ili za učinjenu težu povredu obaveze (discipline);
- c) **Privremena suspenzija sa predmeta**, čime se student ocjenjuje sa „N/A“ za određeni nastavni predmet u semestru kada je povreda učinjena;
- d) **Isključenje sa Univerziteta** na neodređeno ili određeno vrijeme, a izriče se za učinjenu težu povredu obaveza (discipline) iz člana 8. ovog Pravilnika.

Član 15. (Udaljenje studenta sa ispita u slučaju varanja ili plagijarizma)

- (1) U slučaju da predmetni nastavnik, odnosno ovlaštena osoba koja nadgleda tok ispita, nedvojbeno utvrdi da student vara na ispitu, ili pokušava da vara, ili počini plagijarizam prilikom izrade domaće zadaće ili neke druge nastavne obaveze, što je teža povreda obaveze (discipline) iz člana 8. stavovi f) i p) Pravilnika, obavezan je udaljiti studenta sa ispita, obavezno povući i poništiti konkretan predmetni rad studenta, te o tome podnijeti izvještaj dekanu ili direktoru ELS-a radi eventualnog pokretanja disciplinskog postupka, odnosno izricanja direktne disciplinske mjere.
- (2) Ukoliko smatra da neopravdano udaljen sa ispita, student ima pravo podnijeti žalbu dekanu ili direktoru ELS-a, u roku od 2 radna dana od dana održavanja ispita. U tom slučaju, dekan ili direktor ELS-a je obavezan pokrenuti disciplinski postupak radi utvđivanja činjenica vezanih za slučaj.
- (3) Student koji je ocijenjeni sa “N/A” zbog varanja, pokušaja varanja ili plagijarizma, ne može tražiti odustajanje “W”- *withdrawal* (tj. povlačenje registracije) sa određenog predmeta.

Član 16. (Mjere propisane drugim općim aktima)

- (1) Drugim općim aktima Univerziteta, odnosno njegovih organizacionih jedinica, mogu se propisati i posebne mjere za povredu obaveza (discipline), a koje se izriču u postupcima uređenim datim aktima (npr. Pravila o školi engleskog jezika i sl.).
- (2) Na sva pitanja koja nisu uređena aktima iz stava (1) ovog člana u pravilu se primjenjuju pravila utvrđena ovim Pravilnikom.

Član 17.
(Naknada štete)

- (1) Student je odgovoran za prouzrokovanu štetu na imovini Univerziteta ili u vlasništvu drugih lica u okviru kampusa Univerziteta.
- (2) Naknada prouzrokovane štete obuhvata direktnu (stvarnu) štetu u visini stvarnog oštećenja, uključujući i odgovarajuće troškove.

Član 18.
(Kumulacija disciplinske mjere i naknade štete)

Odlukom o izricanju disciplinske mjere određuje se i iznos naknade štete, ako je šteta prouzrokovana.

Član 19.
(Šteta učinjena drugom licu)

Ako je student prouzrokovao štetu na imovini ili ličnom dobru drugog lica, Univerzitet ne odgovara za istu.

III DISCIPLINSKI POSTUPAK

Član 20.
(Prijavljivanje povrede obaveze (discipline))

- (1) Prijavu počinjene povrede obaveze (discipline) i/ili uzrokovanje štete može izvršiti:
 - a) Svaki student;
 - b) Svaki zaposlenik;
 - c) Svako lice koje je angažovano po bilo kojem osnovu na Univerzitetu.
- (2) Prijava se podnosi pismeno, te sadrži:
 - a) Ime i prezime studenta ili studenata koji su izvršili povredu obaveze (discipline), ili prouzrokovali štetu ili ako je moguće, kao i dodatne informacije radi tačnije identifikacije.
 - b) Precizan opis radnji kojima je učinjena povreda obaveze (discipline) i/ili prouzrokovana šteta. U ovom opisu treba naznačiti mjesto, vrijeme i način izvršenja.
 - c) Dokaze (isprave, službene zabilješke, svjedoci i slično).
- (3) Prijava se podnosi dekanu fakulteta koji student pohađa, ili ako student pohađa Školu engleskog jezika, direktoru iste (u daljnjem tekstu: direktor).

Član 21.
(Pokretanje postupka i nadležnost)

- (1) Protiv studenta se može pokrenuti disciplinski postupak u slučaju prekršaja kršenja pravila utvrđenih zakonom, ovim pravilnikom i drugim općim aktima Univerziteta, kao i ugovorom o studiranju, samo ukoliko je dati prekršaj predviđen kao lakša ili teža povreda obaveze (discipline) studenata za koju je propisana odgovornost studenta.
- (2) Postupak za utvrđivanje odgovornosti studenta za povredu obaveze (discipline) pokreće dekan fakulteta koji student pohađa, odnosno direktor u slučaju da student pohađa ELS, pismenim rješenjem koje sadrži podatke iz člana 19. stav 2. ovog Pravilnika.
- (3) U slučaju postojanja jasnih i nespornih dokaza o povredi obaveze (discipline), dekan, odnosno direktor, može odlučiti da studentu direktno izrekne neku od disciplinskih mjera predviđenih ovim Pravilnikom, umjesto da pokrene formalni disciplinski postupak iz stava (2) ovog člana.
- (4) U slučaju kada se mjera izriče direktno protiv studenta, student ima pravo podnijeti žalbu dekanu, odnosno direktoru, u roku od pet (5) dana od dana prijema rješenja kojim može zatražiti pokretanje formalnog postupka, i u tom slučaju dekan, odnosno direktor je obavezan pokrenuti disciplinski formalni postupak protiv studenta.
- (5) Rješenjem o pokretanju disciplinskog postupka imenuju se i članovi tročlane disciplinske komisije iz reda zaposlenika Univerziteta (u daljnjem tekstu: komisija) koja provodi postupak u skladu sa odredbama ovog pravilnika.

Član 22.
(Zakazivanje rasprave)

- (1) Predsjednik komisije zakazuje usmenu raspravu na kojoj se student očituje o odgovornosti za povredu obaveze (discipline) i/ili prouzrokovanu štetu.
- (2) Rasprava se u pravilu zakazuje u prostorijama Univerziteta, za vrijeme radnog vremena na Univerzitetu.
- (3) Na raspravu se poziva student protiv koga je pokrenut postupak, i druga lica čije je prisustvo neophodno.
- (4) Ako student ne pristupi raspravi, komisija može odgoditi raspravu ili odlučiti da nastavi provoditi disciplinski postupak bez naknadnog pozivanja studenta.
- (5) U slučaju da se rasprava održi bez njegovog prisustva, student ima pravo u roku od pet (5) dana podnijeti pismenu žalbu predsjedniku komisije u kojoj navodi razloge nedolaska na raspravu, čiju opravdanost komisija cijeni u svakom konkretnom slučaju.

Član 23.
(Održavanje i tok rasprave)

- (1) Usmenu raspravu vodi predsjednik komisije, na jednom od službenih jezika u upotrebi na Univerzitetu.
- (2) Rasprava se ne može održati ako studentu protiv koga se vodi postupak, poziv za raspravu nije uredno uručen.
- (3) Usmena rasprava se odvija prema sljedećem redoslijedu:
 - a) Konstatovanjem prisustva pozvanih lica i utvrđivanjem njihovog svojstva (lice protiv koga se vodi postupak, svjedok, vještak, ukoliko je to neophodno zbog ozbiljnosti povrede, zapisničar i dr.);
 - b) Čitanjem rješenja iz člana 20. stav (2) Pravilnika;
 - c) Davanjem izjave od strane studenta protiv kojeg se vodi postupak;
 - d) Uvidom u isprave, saslušanjem svjedoka i vještaka, uvidom u odgovarajuće evidencije koje se vode na Univerzitetu i dr;
- (4) Ako se rasprava ne može završiti na jednom ročištu, zakazuje se novo ročište, najkasnije za pet (5) dana.
- (5) U slučaju da student tokom rasprave prizna povredu obaveze (discipline), a komisija utvrdi da priznanje nije dato usljed sile ili prijetnje, te da je student svjestan posljedica priznanja, usmena rasprava se okončava.

Član 24.
(Zapisnik sa rasprave)

- (1) Na raspravi se vodi zapisnik u koji se unose svi relevantni podaci vezani za tok rasprave.
- (2) Zapisnik vodi sekretar fakulteta, odnosno ELS-a.

Član 25.
(Elementi koji se uzimaju u obzir pri donošenju odluke)

Prilikom izricanja disciplinske mjere, uzimaju se u obzir sljedeći elementi: motivi koji su doveli do povrede obaveze (discipline), posljedice uzrokovane povredom obaveza, način na koji su povrede obaveza učinjena, prethodno ponašanje studenta, kao i njegovo ponašanje nakon povrede.

Član 26.
(Donošenje odluke)

- (1) Nakon održane usmene rasprave, komisija podnosi svoj izvještaj o nalazima i utvrđenim činjenicama, dekanu, odnosno direktoru, zajedno s prijedlogom i cjelokupnom dokumentacijom predmeta.
- (2) U roku od pet (5) dana od dana dostavljanja prijedloga, dekan, odnosno direktor donosi

konačnu odluku u formi pismenog rješenja, kojom:

- a) Studenta oglašava odgovornim za povredu dužnosti i izriče mu mjeru i/ili ustanovljava obavezu naknade za načinjenu štetu za koju je student odgovoran;
 - b) Studenta oslobađa odgovornosti ili nalazi da postoje oslobađajuće okolnosti ili da nema dokaza o učinjenoj povredi dužnosti i/ili načinjenoj šteti, ili
 - c) Obustavlja postupak, kad se utvrdi da ne postoje uslovi za nastavak.
- (3) Dekan samostalno odlučuje o vrsti disciplinske mjere koja će se izreći studentu, na temelju činjenica utvrđenih od strane komisije, te stoga nije vezan njihovim prijedlogom.
- (4) Rješenje iz stava (1) ovog člana naročito sadrži:
- a. Ime i prezime studenta protiv koga se izriče disciplinska mjera i drugi podaci o njegovom identitetu;
 - b. Opis povrede obaveze (discipline), mjesto, vrijeme i način izvršenja;
 - c. Vrstu disciplinske mjere i/ili iznos štete, ako je student oglašen krivim; Obrazloženje rješenja;
 - d. Pouka o pravnom lijeku;
 - e. Potpis dekana, odnosno direktora i pečat Univerziteta ili fakulteta, sa djelovodnim brojem i datumom donošenja rješenja.

Član 27. (Žalba)

- (1) Protiv rješenja iz prethodnog člana, student može podnijeti žalbu Vijeću nadležnog fakulteta. Žalbase može dostaviti lično ili poštom.
- (2) Žalba se podnosi najkasnije u roku od pet (5) dana od dana prijema prvostepenog rješenja.
- (3) Vijeće fakulteta može prvostepeno rješenje potvrditi ili preinačiti ili poništiti, u cijelosti ili djelimično.
- (4) Odluka Vijeća o mjeri isključenja postaje konačna tek nakon saglasnosti rektora Univerziteta.
- (5) Ukoliko smatra potrebnim, rektor ima ovlaštenje da od Vijeća zatraži ponovno razmatranje svoje odluke.
- (6) U slučaju iz stava (5) ovog člana, Vijeće donosi konačnu odluku uzimajući u obzir pismeno mišljenje rektora, ako ga je bilo.

Član 28. (Dostava dokumentacije)

- (1) Svaki podnesak koji se treba dostaviti studentu protiv koga se vodi postupak (rješenje o pokretanju postupka, poziv na raspravu, prvostepeno i drugostepeno rješenje itd.), može

se dostaviti studentu lično, putem Studentske službe, ili elektronskim putem na službeni e-mail studenta koji mu je dodijeljen prilikom upisa na Univerzitet.

- (2) Podnesak koji je dostavljen elektronskim putem smatra se dostavljenim u trenutku prijema potvrde o prijemu podneska koji je poslan na službeni e-mail studenta.
- (3) Ako student iz tehničkih razloga ne može pročitati podnesak, o tome će odmah obavijestiti pošiljaoca koji će izvršiti dostavu podneska na prikladan način.
- (4) Ukoliko podnesak nije moguće dostaviti studentu lično, odnosno drugi način propisan Pravilnikom, isti se smatra dostavljenim protekom pet (5) dana od dana isticanja na oglasnoj ploči fakulteta koji student pohađa, odnosno ELS-a, ako je student polaznik iste.

Član 29. (Rokovi)

- (1) Postupak za utvrđivanje odgovornosti studenta za učinjene povrede obaveza(discipline) i/ili prouzrokovanu štetu, ne može se pokrenuti niti voditi po isteku šest mjeseci računajući od dana saznanja od strane Univerziteta.
- (2) Postupak za utvrđivanje odgovornosti studenta za učinjene povrede obaveza(discipline) i/ili prouzrokovanu štetu, ne može se pokrenuti niti voditi po isteku 12 mjeseci, računajući od dana kada je učinjena povreda i/ili šteta.

Član 30. (Evidencija)

- (1) Disciplinske mjere izrečene studentima ostat će zabilježene u njihovim transkriptima ocjena sve dok ne diplomiraju, ne ispišu se ili ne pređu na drugi univerzitet.
- (2) Studentska služba vodi posebnu evidenciju o izrečenim disciplinskim mjerama i naknadi štete.

IV PRIJELAZNE I ZAVRŠNE ODREDBE

Član 31. (Konačnost odluke)

- (1) Nijedna disciplinska mjera izrečena prema studentu se neće primjenjivati do konačnosti odluke.
- (2) Odluka donesena na kraju disciplinskog postupka je konačna i može podržati prvobitnu odluku dekana ili može proglasiti prvobitnu odluku nevažećom i riješiti predmet drugačije.

- (3) Studentu kojem je konačnom odlukom izrečena disciplinska mjera, ukida se stipendija koju dodjeljuje Fondacija za razvoj obrazovanja Sarajevo, u skladu sa Pravilnikom o dodjeli stipendija studentima prvog ciklusa studija na Internacionalnom univerzitetu u Sarajevu.

Član 32.
(Kordinacija provođenja odredbi Pravilnika)

Za sve obaveze u vezi sa implementacijom ovog Pravilnika koje se odnose na disciplinsku i materijalnu odgovornost studenata, Služba za pravne poslove i normativnu djelatnost pruža stručnu pomoć, a Studentska služba pruža tehničku i administrativnu pomoć.

Član 33.
(Tumačenje)

Senat Univerziteta nadležan je za zvanično tumačenje bilo koje odredbe sadržane u ovom Pravilniku.

Član 34.
(Stupanje na snagu)

Pravilnik stupa na snagu danom usvajanja, a primjenjuje se od dana objavljivanja.

R E K T O R

Prof. dr. Ahmet YILDIRIM

POTVRDA O OBJAVLJIVANJU PRAVILNIKA

Otpravak Pravilnika objavljen je istjecanjem na oglasnoj ploči Internacionalnog univerziteta u Sarajevu dana 06.01.2025. godine, u 8:30 sati.

Otpravak Pravilnika objavljen je objavom teksta istog na internet stranici Internacionalnog univerziteta u Sarajevu dana 06.01.2025. godine, u 8:30 sati.

R E K T O R

Prof. dr. Ahmet YILDIRIM

